



Majlis Ugama Islam Singapura

Khutbah Jumaat

29 Mei 2015 / 11 Syaaban 1436

Ilmu Yang Melahirkan Iman

الْحَمْدُ لِلَّهِ الْمَلِكِ الْحَقِّ الْمُبِينِ الَّذِي أَبَانَ لِعِبَادِهِ مِنْ آيَاتِهِ مَا
بِهِ عِبْرَةٌ لِلْمُعْتَبِرِينَ وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ
لَهُ إِلَهَ الْأَوَّلِينَ وَالْآخِرِينَ وَأَشْهَدُ أَنَّ سَيِّدَنَا مُحَمَّدًا عَبْدُهُ
وَرَسُولُهُ الْمَبْعُوثُ رَحْمَةً لِّلْعَالَمِينَ. اللَّهُمَّ صَلِّ عَلَى سَيِّدِنَا
مُحَمَّدٍ وَعَلَى آلِهِ وَصَحْبِهِ وَسَلِّمْ تَسْلِيمًا كَثِيرًا . أَمَّا بَعْدُ فَيَا
عِبَادَ اللَّهِ اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

Sidang jemaah yang dihormati sekalian,

Marilah kita meningkatkan ketakwaan kita kepada Allah s.w.t. Dengan keberkatan bulan Syaaban yang telah berkunjung tiba ini, perbaharuilah keazaman kita untuk mendekatkan diri lagi dengan Allah s.w.t, dengan mentaati perintahNya dan menjauhi segala tegahanNya.

Saudara sekalian,

Sepanjang bulan ini, kita telah mendengar khutbah-khutbah berkaitan kepentingan iman dan takwa serta bagaimana ia seharusnya memperbaiki mutu kehidupan kita di dunia dan

akhirat. Keimanan merupakan sesuatu yang boleh pudar dan hilang jika ia tidak diperbaharui dan diperkukuh. Sesuai dengan hadith Nabi s.a.w. yang bermaksud: *“Sesungguhnya keimanan dicipta di dalam hati seseorang kamu seperti mana diciptakan sehelai baju [yakni ia boleh pudar] maka pohonlah daripada Allah agar Dia memperbaharui keimanan di dalam hati-hatimu”*. [Hadith riwayat Al-hakim dan At-Thabrani]

Maka saudara, kita perlu selalu memantau tahap keimanan di dalam jiwa ini. Perhatikanlah, apa yang menambah iman kita, apa yang menyuburi iman kita, dan apa yang mengukuhkan iman kita. Mengapa kita perlu perhatikan, saudara? Kerana sudah ada di kalangan manusia yang membawa perpecahan dan kebinasaan di atas nama iman. Mereka yakini bahawa perbuatan mereka adalah hasil dari iman. Di sinilah dapat kita saksikan kaitan ilmu dan iman itu. Dengan ilmu yang menyeleweng, dengan pemahaman yang silap, maka terbentuk keyakinan di dalam diri yang disangkakan iman. Sedangkan iman yang sebenar-benarnya tidak akan melahirkan perbuatan keji dan jahat. Ia hanya membawa kebaikan dan kemakmuran.

Allah s.w.t. berfirman dalam surah As-Saba' ayat 6:

وَيَرَى الَّذِينَ أُوتُوا الْعِلْمَ الَّذِي أُنزِلَ إِلَيْكَ مِنْ رَبِّكَ هُوَ الْحَقُّ
وَيَهْدِي إِلَى صِرَاطٍ الْعَزِيزِ الْحَمِيدِ ﴿٦﴾

Yang bermaksud: *“Dan orang yang diberi ilmu pengetahuan yang diturunkan kepadamu dari Tuhanmu; itulah yang benar serta yang memimpin ke jalan Allah Yang Maha Kuasa, lagi Maha Terpuji.”*

Melalui ilmu kita dapat memperkuat akidah dan keutuhan iman dalam jiwa. Ilmu juga memberi kita kemampuan untuk membuat penilaian, dan mengenalpasti yang hak dari yang batil, yang benar dari yang diragui. Inilah peranan ilmu agama. Ilmu yang menjadikan kehidupan kita terarah dan bukannya semakin bercelaru dan keliru. Oleh itu, ulama kita telah berpesan bahawa ilmu itu sendiri adalah agama, maka perhatikanlah dari mana kamu ambil (iaitu pelajari) agamamu.

Namun saudara, persoalannya adalah, bagaimana kita memperolehi ilmu agama yang sedemikian? Para ulama pernah berpesan bahawa terdapat 4 kunci ilmu yang utama iaitu minda yang cerdas, guru yang mempunyai kemahiran ilmu dan mengajar, kitab-kitab yang benar serta semangat dan usaha yang berterusan. Sekiranya salah satu daripada aspek ini tidak diberikan perhatian atau tidak wujud maka pencarian ilmu kita akan menjadi pincang. Jika kita cuai di dalam proses memahami ajaran agama itu sendiri, maka kesudahannya mungkin padah. Kadangkala terdapat keluarga dan pasangan yang berpecah-belah dan saling bertengkar disebabkan pandangan agama yang berbeza. Masih juga ada pelbagai bentuk ajaran yang menyeleweng yang dipercayai masyarakat

Islam. Ada yang masih percaya terdapat manusia yang menerima wahyu dari Allah s.w.t. selepas Nabi Muhammad s.a.w. Pernah juga kita terdengar orang-orang yang mendakwa menjadi penjelmaan tuhan. Ada pula ajaran ekstrim, yang mana fokusnya adalah memutarbelitkan nas-nas agama untuk tujuan keganasan. Ini menjadi lebih genting kini dengan aliran maklumat yang tidak terbatas dan sukar untuk dikawal di internet. Maka golongan yang inginkan kehancuran menggunakan internet sebagai wadah untuk menyebarkan fahaman serta ideologinya.

Tentu sekali kita wajib berwaspada. Ajaran-ajaran yang menyeleweng memang ada tarikannya. Kalau tidak, pasti tidak ada pengikutnya. Apakah daya tarikan utamanya? Biasanya, ajaran dan propaganda mereka yang sesat ini adalah menjadikan kita berasa istimewa. Bilamana kita mula mempercayai mereka, kita berada di dalam kelab eksklusif yang hanya boleh dianggotai oleh mereka-mereka yang terpilih. Maka saban hari bertambah keyakinan mereka bahawa mereka golongan terpilih, dan hanya mereka sahaja berada di atas landasan yang benar dan orang lain adalah sesat dan bahkan perlu ditewaskan atau dihapuskan. Hati-hatilah saudara dengan ajaran yang berbentuk demikian.

Umat Islam ini terpelihara dengan wujudnya kesatuan dan kesepakatan. Ini bermakna, selagimana sesuatu ajaran itu diketahui, dipelajari, dan diikuti oleh umat secara keseluruhan,

maka ia adalah ajaran yang baik lagi terpandu. Ajaran sedemikian tidak akan menjadikan kita berasa lebih mulia, lebih baik dari orang lain. Maka kita perlu memastikan ilmu yang kita cari itu adalah sesuatu yang diterima dan diamalkan masyarakat umum serta disepakati ulama-ulama muktabar. Ini sesuai dengan hadith Nabi s.a.w. yang bermaksud *“Sesungguhnya umatku tidak akan bersepakat di atas sesuatu kesesatan.”* [Hadith riwayat Imam Ahmad dan Thabrani]

Hanya kerana seseorang itu boleh berceramah tidak bererti bahawa mereka adalah guru agama yang mempunyai autoriti mengajar. Selidiki latar belakang mereka. Bandingkan ajaran mereka dengan guru-guru agama lain yang diiktiraf masyarakat umum. Perluas dan pelbagaikan bahan bacaan kita. Akhirnya saudara, kita tidak mahu menjadi seperti orang-orang yang disebut Allah s.w.t di dalam Surah Al-Kahfi ayat 103-104 *“[Katakanlah Wahai Nabi Muhammad] Mahukah Kami khabarkan kepadamu akan orang yang paling rugi amalan perbuatannya? Iaitu orang-orang yang telah sia-sia amal usahanya dalam kehidupan di dunia, sedang mereka menyangka bahawa mereka sentiasa betul dan baik pada apa sahaja yang mereka lakukan.”*

Banyak-banyaklah juga membaca doa yang diajarkan Baginda Nabi s.a.w:

اللَّهُمَّ إِنِّي أَعُوذُ بِكَ مِنْ عِلْمٍ لَا يَنْفَعُ، وَدُعَاءٍ لَا يُسْمَعُ، وَقَلْبٍ لَا
يَخْشَعُ، وَنَفْسٍ لَا تَشْبَعُ، اللَّهُمَّ إِنِّي أَعُوذُ بِكَ مِنْ هَوْلَاءِ الْأَرْبَعِ

Yang bermaksud: “Ya Allah aku memohon perlindunganMu daripada ilmu yang tidak bermanfaat, daripada doa yang tidak didengarMu, dan daripada hati yang tidak khusyu’, dan daripada jiwa yang tidak pernah puas. Ya Allah aku berlindung denganMu daripada keempat-empat perkara.”

Semoga Allah mengurniakan kita kemampuan untuk meraih ilmu yang benar dan bermanfaat. Mudah-mudahan juga Allah kekal mengurniakan kita bimbingan dan panduan di dalam memelihara keimanan kita sehingga kita bertemuNya kelak. Amin Ya Rabbal ‘Alamin.

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ
الْعَلِيمُ، أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا
فَوْزَ الْمُسْتَغْفِرِينَ وَيَا نَجَاةَ التَّائِبِينَ.